

EDICION SPECIAL HIMNO Y BANDERA

LOKE HOPI A PERDE DI CANCIONNAN DI "FESTIVAL HIMNO Y BANDERA"

skirbi pa: Juby Naar

Scuchando e cancion di **Jurick Salomon** den **Un Canto pa Nos Himno y Bandera**, mi a cumenza pone atencion riba temanan cu ta wordo canta. Hopi tema tabata tin e tradicional, hisa bo bandera, zwaai bo bandera, etc. pero tabata tin algun cu temanan cu normalmente masha poco bo ta haya den e festival, pero cu e aña aki tabata bin dilanti cu mas frecuencia.

Mi a dicidi di tira un bista den e paki di composicionnan cu mi tabata tin di e letranan, y a reparti nan den diferente seccion.

TEMANAN

Tur aña ta tende varios biaha di **"mi lombrishi ta dera na Aruba"**, tambe a Aruba aprecia ta bin dilanti continuamente mescos cu **"nos bandera nos propio identidad"**. Varios composicion ta bini cu **"cuida nos tradicionnan; cuida nos cultura; cuida nos norma y balornan"**.

Otronan ta menciona nos **"cuminda di cas"** cu turisticamente ta wordo yama **"cuminda crioyo"**, hasta si e ta di otro paisnan y cu tur a bira crioyo.

Ora di un tumba ta bin dilanti **"balia nos tumba"**, of por haya **"balia nos ritmonan folklore"**, pero mester tende tambe keto bay **"Arubiano mi ta!"**

Tur aña principalmente cerca e muchanan nos ta haya les tocante nos bandera cu su strea cora di 4 punto.

E aña aki atrobe por a scucha di **"proteha e pida baranca aki"**; **"nos mester ta orguyoso di nos musica, nos cultura, nos fauna y flora y nos naturaleza en general"**. Papiamento no ta keda afo ningun aña y su proteccion tambe ta wordo canta. **"Stima nos papiamento, nos lenga materno"**.

No ta keda afo ningun aña cu **"sanger di indian ta core den mi benanan"**.

Asina mi por sigui menciona kico ta wordo ripiti aña tras aña, pero e aña aki por a ripara un cambio. A canta entre otro di **Union**.

UNION

Un di e cancionnan cu **Union**



tabata cu **"No paga e calor, ni kita mi ilusion pa un dia mira mi Aruba, biba hunto den union."**

Compositornan di letra a percura e aña aki pa expresa cambionan cu ta tuma lugar den nos comunidad: **"Nos ta na tempo pa cambia e rumbo di nos pais, pasobra un tera sin union no por progresa"**. Tambe a expresa e stimacion cu nos tin pa nos isla y cu mester tin **"Amor pa nos nacion; amor pa nos folklore"**. Ta scucha di **Union** basa riba comentarionan diario tocante sucedidonan y a implora pa: **"Ban cana positivo, ban cana den union"**; **"Trece paz den nos cas, uni un cu otro"**.

Den un di e cancionnan cu a pidi pa **union y paz**, a wordo menciona entre otro: **"cu dolor den mi curazon mi a observa nos pueblo, con, yen di anhelo por mira otro trompeca."**

Ademas loke bo ta tende diariamente cu **"Ora un yiu di tera sobresali den su materia. Con yen di esfuerzo 'nan' ta haci pa busca moda pa difam'e."**

Ta bini e pregunta: **"Di con Arubiano mescos cu bo, no por triunfa?"** E otro pregunta cu bo ta tende continuamente y cu tambe a keda expresa den un di e cancionnan: **"Pakico esnan di afo ta wordo carga cu man di felpa?"** E contesta cu a bini riba e preguntanan por a scucha den e letranan **"Ban bek den tempo di nos mayornan caminda e yiu di tera, na cas tabata rey."**

CULTURA DI NOS

Tocante nos cultura tambe ta wordo canta anualmente y casi tur ora ta e mes frasenan y expresionnan ta bin dilanti. E aña aki por a scucha entre otro: **"Loke ta di nos cultura, tene bibo su expresion"**; **"Loke ta di nos, nos mester proteh'e cu tur honor"**. Otro cu a expresa: **"Mi n' por cana man cruza mira mi cultura bay perdi."**

DI AFO

Di esnan cu ta bin di exterior sa tende kehonan durante aña y den algun composicion por a scucha entre otro: **"Laga nan siña for di nos, cu amor y paz ta e solucion, con ta biba aki na Aruba"**. Tambe a scucha e palabranan: **"Locual bo mira, locual bo scucha, mesora bo sa di unda e persona ta."** **"Si bo scuchami papia y canta, mes ora**

bo sa di unda mi ta."

Frase cu a bin dilanti tambe ta **"mi ta come crioyo, balia folklore, papia mi dushi papiamento, esaki ta e amor pa mi patria"**.

TESORO

E tesoro cu Aruba ta, a wordo canta tur aña y e aña aki el a bin dilanti na varios ocasion tambe den composicionnan cu **"Aruba ta mi tesoro"**; **"e tesoro mas bunita den Caribe"**; **"e tesoro precioso, un clompi oro cu no tin pa iguala"**.

Un cancion no a menciona e tesoro pero si e perla rondona cu santo blanco y lama, nos ta bendiciona di yame nos cas.

DIPLOMA

Un tema aparte tabata e **"Diploma cultural"** cana pa **Jason Kelly**. El a presenta como e estudiante disciplina cu bukinan di historia riba lomba, cla pa comparti y brinda lo mihor pasobra e kier destaca sin importa obstaculonnan den su caminda. Tur esaki pa e admiracion cu e tin pa su Pais y orguyoso di su raiz. El a conta di su lucha pa progresa y awe cu honor ta entrega su isla e **"diploma cultural"**. Esaki pasobra Aruba ta bal e. Aruba a siñ'e **"norma y balornan, y cultura di Aruba a impact'e y historia di Aruba a impresion'e"**. Manera e composicion a sigui carga Aruba tabata otro di locual di custumber sa tende di elogio

pa nos isla.

STUDIANTE

Tabata tin mas composicion basa riba studiantenan y kendenan a canta di nan deseonan pa nan isla y tambe di e manera cu nan lo prepara pa bolbe y traha pa nan pais. Por a scucha frasenan manera: **"Un dia lo mi bay afo pa prepara mi futuro y bon studia lo mi bolbe"**; **"Lo mi opone mentira, falsedad y tur traicion."** Studiantenan cu kier of lo bolbe nan isla pasobra **"mi pais tin retonan isla, no ta motibo pa cobardia o kizas entrega"**. **"Ban dobla manga di kita tur baranca cu presenta den caminda."** Studiantenan cu deseo y anhelo grandi pa traha pa nan pais. **"Man den man, duna un man na un ruman pa un mañan sin obstaculo"**; **"Dia mi bolbe mi lo ta feliz pa traha pa mi pais"**; **"Lo mi canta 1000 cancion cu mi a skirbi leu for bo"**

Unda cu nos studiantenan ta, semper e pensamiento primordial ta pa logra y bolbe nan isla bon studia y pa yuda e isla progresa: **"mi pueblo ta sufri e tin dolor, pena grandi den mi curazon. Mi ta priminti cu despues di mi estudio lo mi bolbe cerca bo. Cu mi Aruba den mente bon studia lo mi regresa"** Tambe a bin dilanti e deseo pa **"elimina inhusticia y mentira y pa e pueblo di Aruba wordo respecta."**

PARHA Y FLOR

Anualmente ta haya tambe cancionnan tocante nos lama blauw; e awa cla; parhanan cu ta bula tur caminda, solo cu ta baha y bisa **"te mañan!"** Biento suave cu ta caricia nos cara. Tambe ta scucha di beyeza di nos naturalesa, flora y fauna unico, **Kibrahacha, fofoti, chuchubi, moffie, totolica, buladijfi**, y e aña aki un biaha mas e **trupial**.

E **rosa** a bin dilanti y a canta con **"tur mainta mi ta papia cune. Rosa bunita, si solamente bo por sa cu bo tera fertil, hoi hende ta desea"**. E ta referi aki na **Aruba**, usando e **Rosa**. Pa nos bandera un composicion tabatatin

EDICION SPECIAL HIMNO Y BANDERA



e sumpiña pa proteha nos Himno y Bandera.

“Hincá tur hende cu kier kit’e for di nos. Proteha nos Status aparte, tene tur hende leu pa semper nos kea cune”.

PINTURA

Loke a bin dilanti e aña aki, mas cu den pasado ta di **pintamento di nos isla**, usando colorman pa expresa bunita di e pida baranca aki. **Giliane Wester** a pidi pa “**pinta Aruba cu color, cu amor, cu pasion**”. El a muestra den su pintura cu **Aruba ta e cuadro mas bunita**. El a usa su **cuashi pa pinta e “conchi” riba e lona** y con e olaan ta kibra. Cú wowo cera e ta imagina kico e ta pinta di e **tera primiti** di cual e ta forma parti.

Pero **Kenduart Henriquez** a muestra con un pintor a pinta un dia, e compania tur na huma y hopi luz biniendo abao riba cero di **Savaneta**. El a para pinta hopi boto di piscador pasando **Pos Chiquito yega Santa Cruz**. Aki el a pinta un paloma riba graf di libertador pa recorde cu ta e dia cu pueblo ta celebra **Himno y Bandera**.

El a pinta e boto ta bin abao pa **Playa pa pinta nos Escudo y nos bandera**. El a des-cansa a bay **Noor** y na **Capel di Alto Vista** pa reza pa Tata manda bendicion riba su isla stima.

El a pinta e **ceronan**, nos **lama blauw**, nos **cadushinan**, **wataana**, **kibrahacha**, y **Aruba su hendenan bunita y amabel di Curazon**.

CHIKITINNAN

Den e composicionnan canta pa nos chikitinnan, e aña aki por a scucha e pregunta di “**siñami di mis hendenan, di mi isla, dimi historia etc**”. E chikitonan a canta di ; “**mi abuelo of mi tata of mi mama a contami**”. E contamento ey a pone cu nan a canta: “**mi a siña di mi historia, di mi pais y di Aruba su antaño**”. Nan a siña ademá di “**respet pa prohimo, norma y balor, disciplina**”, cu nos a lanta cune. y casi tur tabata algo di “**mi kier aporta na nos cultura**”. Di e parti di mucha no por keha ni bin cu nada negativo pasobra e temanan aki, aunke nan keda ripiti anualmente, nos muchanan ta siña di nan.

HUBENTUD

Loke si tabata un vuelta cu mi no a spera den letranan di composicionnan, ta locual a bin dilanti di hubentud of dedica na hubentud. Hopi basa riba sucedidonan diario cu hubentud envolvi y cu consehonan pa tur.

Tin cu a canta: “**Cu un curazon dolor pa mira hubentud di Aruba. Un dolor profundo pa mira algun ta desvia**”. A muestra riba actitud di hobennan y cu e pregunta: “**Cuanto di nan a perde nan bida pa desobediencia** ?” Tambe a canta di “**violencia y abuso cu parce di nan a podera**”. E suplica por a tende tambe den composicionnan pa “**yuda unda por coregi nan di mal caminda. Duna un bon ehemplo. Ban bek den tem-**

po di nos mayornan unda disciplina y respet tabata existi.”

Den un composicion a wordo puntra na hobennan: “**Hoben expresa bo mes, Aruba ta den bo man, wak pa bo no destrui**”.

COMPILACION

Por formula algun frase na otro cu ta menciona hunto: “**Mi n’ ta bisa cu e amor pa mi patria no tey mas. Tampoco tira culpa cu nos ta multicultural. Nos no por keda warda kizas ta mucho laat. Hobennan ban demostra e amor pa bo pais**”. “**Futuro ta abo hoben arubiano. Futuro ta un derecho cu ta coresponde bo. E luz cu lo inspirabo. Futuro ta e fruto di bo sodo**”.

“**Hobennan ban canta den un solo voz. E aire negativo, biento supla bay cune**.”

Un di e preguntanan cu por a tende ta: “**Hobennan pakico kibra otro pa bo mes probecho** ?” Tin letra cu a menciona tocante hobennan y tocante critica: “**Punta un dede y 3 ta punta riba bo**.” “**Ban sigui soña cu un dia nos lo realiza. Si bo no por yuda no critica. Awe nos kier pidi boso nan uni den un cancion un solo voz**.”

Un toke positivo di hoben a bin dilanti den un di e composicionnan pero mas bien relaciona cu un estudiante: “**Mi isla ta un isla impactante, historia interesante y unda mi lombrishi ta dera. Pesey como hoben mi no por kere con tin hende ta despreci’e. Pesey como hoben ami tur**

dia ta studia duro pasobra mi ta apreci’e”.

SEMBRA

Un di e cancionnan cu mi a gusta su palabranan masha hopi ta di **Gabriela Krozendijk**. E cancion aki a ponemi pensa riba e “**Cunucu di Zuid**” di su tata “**Don**” **Ramon Krozendijk d.f.m.** cual

cancion ta un di e hoyanan grandi di repertorio di cancionnan y composicionnan inolvidable di nos isla. Mi a keda encanta con **Gabriela** a sembra e simia riba e cunucu cu yama **Aruba** pa por cultiva y cosecha felicidad, libertad y bendicion. na lugar di describi e cancion aki, mi ta laga publica e letranan den e parti aki di e edicion aki.

M’a sembra un simia.!

Solo:

M’a sembra un simia, riba tera di abundancia
m’a proteh’ cu speranza, m’a brinde tur atencion.
Cu tur dedicacion, m’a percura p’e cada dia
dun’e tur mi energia, p’e por nace cu amor
Ariba tera fertil di mi Aruba dushi tera,
m’a sembra cu alegria y a cultiva felicidad.
M’a recoge tur fruta y recompensa di e trabao,
e cosecha di libertad y bendicion.

Coro:

M’a sembra un simia di amor y paz riba mi tera.
M’a muh’e tur dia cu awacero di bendicion
riba e mesun suela cu a wak nos lanta y sostene nos.
M’a mira mi simia duna bida fo’i e su interior.
M’a sembra un simia di fe y union riba mi tera.
El a plama tur caminda, sembra p’e mannan di Señor
Ariba e mesun suela cu a wak nos crece y ta alimenta nos,
m’a mira mi simia, duna frutonan di amor..!

Instrum.

Solo:

M’a proteha e simia, cu pasenshi y constancia,
m’a muh’e cu awa bendita, pa refresca su interior,
pa mi por wak e brota, fuerte for di e tera,
yen di bida y energia, un mata sano bon planta.
Cu takinan bunita manera brasanan cu ta brasami
cu blachinan cu ta brindami sombra y calor,
Cu e magia di e fofoti, mas special,
cu tur dedicacion di un obra di arte magistral !

coro:

M’a sembra un simia di amor y paz riba mi tera etc.

Solo:

Ni maske cu biento supli, mi no lo cay
mi raiz ta bon planta
p’e mannan di un bon arubiano,
cu ramanan baliando cu biento di lama
un luga perfect, pa sinta y relaha
Si bo haya un chens pa sembra un simia
corda sembr’e cu amor y dedicacion !

coro:

M’a sembra un simia di amor y paz riba mi tera

Cantante: Gabriela Krozendijk

Grupo musical: Alma Folklorico

Comp: Jhon Freddy Montoya(letra)
Edseline Figaroa(melodia)